

29/05/2000

MIC luluskan 13 resolusi

KUALA LUMPUR, Ahad - Perhimpunan Agung MIC ke-54 yang berakhir hari ini, meluluskan 13 resolusi merangkumi aspek pendidikan, sosial, ekonomi dan perumahan membabitkan masyarakat India masyarakat India Malaysia.

Perwakilan juga sebulat suara meluluskan usul menyokong penuh kepemimpinan Perdana Menteri, Datuk Seri Dr Mahathir Mohamad untuk terus menerajui negara.

Turut diluluskan mengenai pembabitan usahawan India dalam perniagaan kecil dan sederhana, sekali gus mencapai hasrat kerajaan menghapuskan jurang perbezaan antara kaum di Malaysia.

Kebanyakan perwakilan berpendapat kerajaan dan pihak swasta harus berganding bahu menyelesaikan masalah yang dihadapi peniaga India tempatan bagi membolehkan mereka mengecapi keuntungan sama rata daripada kek ekonomi negara.

Selain itu, peningkatan satu peratus dalam perkongsian ekuiti korporat kaum India sejak 30 tahun lalu disifatkan masih rendah berbanding kaum Bumiputera dan Cina.

Sehubungan itu, mereka juga meminta kerajaan mengkaji semula Pendapatan Garis Kemiskinan (PLI) dan menubuhkan unit khas penyelarasan bandar bagi mengatasi masalah sosial membabitkan belia India serta mengatur kegiatan yang bersesuaian bagi meningkatkan pencapaian sosio ekonomi kaum itu.

Selain itu, perwakilan turut mendesak Kementerian Sumber Manusia menguatkuasa skim pemilikan rumah untuk pekerja ladang dan lombong selaras dengan Akta Piawaian Minimum Perumahan dan Kemudahan Pekerja 1990.

Masalah sosial yang semakin menjadi-jadi turut dibangkitkan perwakilan dan berharap Kementerian Belia dan Sukan mencari strategi lebih praktikal untuk menggalakkan belia India yang terbabat dalam gejala tidak sihat, menyertai program kesedaran di bawah skim Rakan Muda.

Perwakilan turut menggesa kerajaan melaksanakan program pendidikan prasekolah secepat mungkin, khususnya untuk kanak-kanak luar bandar dan kawasan ladang bagi menyediakan mereka memasuki zaman persekolahan kelak.

Mereka juga berharap kerajaan dapat meningkatkan kuota untuk pelajar India memasuki kelas matrikulasi dan universiti awam, memandangkan keputusan SPM dan STPM yang semakin meningkat dari tahun ke tahun.

(END)